

四庫全書

史部

欽定四庫全書

史部

江南通志卷一百四十五

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卜維吉

謄錄監生臣繆濂

欽定四庫全書

江南通志卷一百四十五

人物志

宦績

七

太海通三州

太倉州

宋郊亶字正父太倉州人第嘉祐進士授睦州團練  
推官熙寧中上書陳蘇州水利指畫條悉爲吳中  
言水利者之準的王安石善之授司農寺丞提舉

興修兩浙水利子僑字子高亦有才

孫載字積中嘉定人居練祁市爲河中府戶曹  
歷事三守皆侃侃與爭曲直會察訪使辟爲官  
屬時乾佑縣令不奉行青苗法使載按之載言  
邑小民貧令實無罪知德清以德化民訟有累  
年不決者得一言皆感悟去歷知海沂婺毫諸  
州皆務大體時號循吏大觀中以朝議大夫致  
仕

龔宗元字會之居今太倉界以鄉貢知句容縣摘  
發如神楊紘持使節行部號深酷至境曰龔君已  
治吾往徒擾遂不入仕至都官員外郎

明袁銘字德新嘉定人隱居東海倡明春秋學洪武  
中召對侃侃直諫除蘇州訓導與鄭閔同爲經生  
所宗閔字以純精易學長洲縣學博

陳述字宗理嘉定人宣德間爲四川叅政時流賊  
剽掠官軍失利述至推誠招撫降者三百餘人已

而德陽賊燒劫祈安縣述統兵當賊衝間出奇兵  
撓之旬日悉平初蜀民不務本計述設法勸課數  
年間農桑遍野民用饒裕致仕後蜀人立祠祀焉  
著有農桑風化錄靜軒集

陸容字文量太倉人少與張泰陸欽稱婁東三鳳  
成化丙戌進士歷職方郎中籌畫邊事動中事宜  
外國貢獅子至廷議遣大臣迎之安南與占城闕  
議發兵往擊容俱力論得寢時告變者賞重錦衣

百戶韋瑛掩平民告變容請詔法司鞠瑛坐誅告者漸衰弘治初有倚中貴求將者上面諭之執不下事竟止太監李良舉都指揮王欽梁宏爲都督僉事命已下容劾良市恩擅權卒奪所授出爲浙江叅政列上急務十事并論漕渠利害不報尋罷姜昂字恒頰太倉人成化壬辰進士令棗強爲治清簡獄無滯囚授監察御史劾方士李孜省之奸杖午門尋以親老乞近郡便養改知寧波府擢福

建叅政昂性方潔在官日惟市少肉供母而自食  
蔬菜子龍字夢賓爲禮部郎中諫武廟南巡杖幾  
死後爲滇中兵備莅任四年漢夷大治滇人立祠  
祀之

龔弘字元之嘉定人成化戊戌進士歷吏部郎出  
知兗州奏免額外稅糧萬石時中貴李興過充勢  
張甚弘獨長揖不屈累遷右副都御史總督河道  
武宗嘗稱之爲幹事老臣後以工部尚書致仕所



著有玉書樓稿嘉定縣志

楊瑛字潤卿嘉定人成化丁未進士弘治初爲兵  
科給事中上疏請革弊政以保初治嘗夜出遇貴  
璫爭道批其頰璫泣訴上曰知是長楊須少避之  
後官至太僕少卿

胡承字安節太倉人成化丁未進士除翰林檢討  
充益王府講官陞左長史承文學該洽侃侃持正  
在王府隨事規益後卒于官

范純字誠夫嘉定人成化中爲四川僉事以計敗蠻兵于威州轉松潘兵備會鎮守內臣借供奉索金于各衛純止之不聽遂投劾歸

周廣字充之太倉人弘治乙丑進士爲吉水令贛川流賊至吉水丞簿懼且竄廣叱曰丞簿竄即死盡死賊率衆力禦城得以完擢監察御史抗疏直言爲羣小所嫉屢經貶謫後爲福建按察有鎮守中貴遺以金廣不省置之庫中貴懼謝罪乃與約

毋撓吾三尺返其金仕至江西巡撫

唐思字天寵嘉定人弘治中進士生平品行端方其教及門嘗曰讀書無他務只一靜字檢身無別法只一敬字爲松陽令以信義得民心縣歲貢橙橘民苦科索思令官自採辦不煩一民以疾卒官檢其橐止俸金三兩而已

沈灼字文燦嘉定人正德戊辰進士爲御史首發宸濠之逆又嘗言朝廷刑獄不宜付錦衣官校忤

旨奪俸後以議大禮不見聽與句容曹鋒崑山方鳳同日掛冠歸時稱三諫從兄炤字文明爲刑科給事出按潼關守將姚諫獄不附劉瑾意予杖謫

戊

周在字善卿太倉人正德甲戌進士知寶坻縣時中官橫索困民在執法使不得擾縣有豪紳素附劉瑾犯罪在繩之以法乃構廠監誣在以他事繫之獄法司直其誣後爲御史仍執法無少徇仕至

浙江叅政尋罷歸

顧濟字舟卿太倉人正德丁丑進士由行人爲給事中時武宗歸自南巡濟上書切諫嘉靖改元八上疏其納諫疏畧云陛下首闕言路羣臣因事納忠高遠似迂闊切直或犯顏若怒犯顏則言必忤置迂闊則計必格安望忠言日聞乎陛下首翦羣兇而奸黨尚存乘機搖惑不可不畏上嘉納之後

乞終養歸

高鏊字企之嘉定人正德中以太醫諫南巡廷杖  
謫戍嘉靖中進院判

丘峻字惟陟嘉定人嘉靖己丑進士授大理評事  
每讀獄詞必反覆紬繹同舍郎欲署事輒援其筆  
曰君輩勿輕作允字有大閹出鎮廣東多不法坐  
辟乃因鄉人密以萬金爲壽峻曰五嶺之人思食  
其肉峻爲法官而縱之乎竟論如法

朱默字時言太倉人嘉靖壬辰進士知建陽縣嘗

以俸百金奉父父怒貽書曰吾辛勤教汝惟忠與  
孝汝甫邀一第乃以官物污我耶默得書益砥廉  
操輕徭賦省鞭笞政聲大著後補貴溪令時值夏  
言當國默無所徇言甚愛重之

陳如綸字德宣太倉人嘉靖壬辰進士令侯官鞠  
獄如神常緩催科主計者逮其家屬如綸欣然  
出僕就繫民感德爭輸遂爲諸邑最擢刑部主  
事歷官江西按察福建布政乞歸有永豐令某餉

茶納百金其中如綸却弗視曰吾方飲水無所用  
茶其清操如此

顧存仁字伯剛太倉人嘉靖壬辰進士爲禮科給  
事時指揮劉永昌與蜀王相奏訐武定侯郭勛庇  
之存仁考按得實抵永昌罪會災異求直言存仁  
援議禮竄逐諸臣指斥方士忤旨杖六十謫塞外  
三十年隆慶初仕至太僕寺卿

王忬字民應太倉人嘉靖辛丑進士以御史巡按



湖廣時大璫鎮承天爲民害忬至與約毋縱舍人  
子漁百姓璫懾不敢犯再按順天備禦有方擢僉  
都御史巡撫山東會倭起以忬巡視江浙邀擊大  
創後先告捷會薊遼總督員缺即命忬往時練兵  
議起相嵩陰扼之以失事下獄論死天下寃之隆  
慶初子世貞疏訟詔復其官

唐愛字良德嘉定人嘉靖辛丑進士知南安縣治  
行爲八閩第一人爲職方郎時邊事告急大司馬

計無所出愛從容區畫京師倚重焉

徐敦字汝厚太倉農家子少嘗服賈年三十始讀書成嘉靖丁未進士知諸暨陽信二縣廉潔有威望入爲御史抗疏論馭懋卿忤嚴嵩指出爲山西僉事屢中蜚語與時寡合遂以苑馬寺卿致仕

張任字希尹嘉定人嘉靖丁未進士守袁州分宜當國家衆素橫任一切繩以法累遷貴州叅政後撫粵會苦旱特題蠲賑又請勅十寨諸蠻爲民害

者捷聞賜璽書褒勞卒贈兵部右侍郎

王世貞字元美太倉人嘉靖丁未進士爲刑曹郎  
與李攀龍等相倡和時稱七才子以救楊繼盛忤  
嚴嵩出爲青州兵備青多盜世貞約束期年盜盡  
散會父忤爲嵩所殺棄官伏草土者幾十年嵩敗  
以薦復起歷仕浙江叅政湖州久雨粟踴貴世貞  
捐俸募民入粟又疏乞改折民得無饑由藩臬陞  
撫耶陽時相居正婦弟王生譁辱縣令世貞論如

法又以荊州地震上言臣道太盛語觸居正遂拂  
衣歸後仕至刑部尚書世貞操文柄數十年海內  
士多藉以成名鄉曲利病詣臺司力請終世貞曰  
荻州者無苛政其歿也民皆巷哭罷市所著有四  
部稿續稿明史料等書子士騏字岡伯鄉試第一  
成進士爲吏部郎能文

徐學謨字叔明嘉定人嘉靖庚戌進士爲職方主  
事董築城外八堡汰去冗冒忤仇鸞意又嚴嵩屬

以青詞辭不爲銜之浮沉郎署者十年出爲荊州  
守荆之興山賊數千窟其中縣令中賊餌不以聞  
學謨以事繫令急發兵擊之諭降三千餘人山谷  
盡平景恭王封德安以國小求荆之沙市地自益  
學謨據祖制爭辯甚力王以抗旨劾之有詔逮問  
民遮道哭者數萬得從末減後累晉少司寇太宗  
伯乞歸嘗首建漕折議爲一方無窮之利云所著  
有南宮奏稿老子解世廟識餘錄湖廣總志春秋

億宗藩要例文集合二百五十二卷

顧章志字行之太倉人嘉靖癸丑進士授行人奉使南越絕餽遺時相嵩鬻權章志獨不附移疾歸嵩敗起官累進湖廣廣西按察副使靖江王府屯地有與民田相錯者王圖并得之章志持不可陞南京兵部右侍郎後卒于官

張振之字仲起太倉人嘉靖己未進士授處州推官署府事首舉條鞭法貴要斂手徵爲監察御史

史抗疏劾貴臣又論列戶部姦利狀仕至浙江按察副使

浦鏗字汝器嘉靖間爲監察御史以直言忤旨奪俸尋掌河南道事時屆京察執法不阿失執政意罷去以薦再起出按陝西上便宜四十餘疏後以疏救御史楊爵被逮卒于獄

狄雲漢字天章太倉人由鄉貢知沅江尚寬靜民愛信之都御史馬溥然行縣怪無訟者令吏人呼

民許令陳訴卒無一應御史嘉歎而去九年秩滿歸貧無室廬處士沈周爲作募買宅疏

王錫爵字元馭太倉人嘉靖壬戌會試第一歷官禮部侍郎時張居正奪情翰林吳中行趙用賢上疏力爭居正怒錫爵率同官解之居正假歸治喪未匝月部臣急請召還使吏邀署名錫爵叱之去遂乞省親歸居正敗以禮部尚書入閣會有三王並封之議諸臣疏諫者且得罪錫爵力爲調劑事



得中輟後竟以錫爵言皇長子出閣如東宮儀遂  
求歸錫爵學有原本文章得唐宋人風格所著奏  
草文草牘草若干卷卒諡文肅子衡字辰玉有文  
名北闈領解被論奉旨覆試援筆立成仕編修  
乞終養歸

曹達字履中太倉人嘉靖間進士爲御史糾太宰  
汪鉉不法語過峻廷杖謫隨州判人稱爲強項曹  
會署蘄水令時太后梓宮過蘄水責供億甚急達

飭吏民手板立水次常廩外不益一錢曰蘄水非  
中貴人外藏也中貴人詢知曰是故強項曹耶引  
帆去歷遷雲南太守

曹祥字世奇太倉人知新昌縣省里甲築隄防斥  
豪猾九年風俗大變吏部郎應大猷稱爲循吏第

一

王積字子崇太倉人嘗爲廣東陝西叅議後爲湖  
廣叅政以計平苗遷福建叅政有破倭功世宗題

其名于御屏

龔起鳳字瑞周太倉人以舉人爲定州學正典中  
州試故事學官先考後聘起鳳持不可曰禮聘者  
師也師可試乎遷知杞縣歸德有豪家李姓者殺  
人賄令得脫上官移起鳳訊之令款迎甚謹私致  
千金起鳳不顧窮治伏罪御史行縣供帳儉陋竟  
以不及論罷杞人泣送盈路醵金爲贖起鳳却之  
而歸灌園自給園多種韭時稱龔公韭云

龔有成字子完嘉定人少學於歸有光鄉薦上春  
官所與偕者以疫死同舍避去有成獨留視醫藥  
死爲含殮護其棺以歸士高其義後爲詔安令時  
倭盜交訐有成誘致賊首諭令縛盜自贖盜皆解  
散調龍南令會三巢賊熾有成親往諭以禍福賊  
皆悅願輸租編甲由是終任無爲盜者

陳其詩字汝正嘉定人以舉人補新泰縣令值大  
旱具文禱于泰山夢神賜杯水曰新令虔與爾解

渴質明大雨有囚赴決在道逸去監司將罪令囚  
遽自出曰不可以我故負令君

管志道字登之太倉人隆慶辛未進士官南刑部  
主事陳大利弊九事語侵相臣張居正大恚因志  
道疏內請修故甲令分巡與御史抗禮即出志道  
分巡嶺東諸郡志道至部果與御史齟齬御史劾  
奏之以言官救得降調遂移疾歸

侯堯封字欽之嘉定人隆慶辛未進士爲御史按

閩閩有獄建寧守受賕失出堯封劾之守恃與援  
左遷堯封爲僉事分巡蘄州蘄故有盜出沒江中  
堯封置樓船搗其穴悉平之備兵襄陽嘗增城實  
堤築石梁二以通峴山既而水大至城外之民由  
石梁得度者無算後遷福建叅政致仕

龔錫爵字汝修嘉定人萬歷甲戌進士由縣令爲  
水部上河漕議于司空潘季馴以河強淮弱惟築  
堤束水可以濟漕卒如議報功遷廣東叅政歸

張恒字明初嘉定人萬歷庚辰進士知建昌府片  
言折獄人稱爲張半升以候鞫不待宿春也時相  
國有與小民爭湖利者恒奪以與民舉江右循吏  
第一仕至參政

殷都字開美嘉定人萬歷癸未進士知夷陵州時  
蜀鹽禁嚴販者嘗乘夜出峽舟多沒溺都謂步擔  
易米律所不禁悉寬之遂無溺者又開楚蜀界山  
道九千丈以便行人遷職方郎尚書石星忌其才

劾令罷歸

沈昌期字廷際太倉人萬歷癸未進士知龍溪縣  
爲政得民心以最擢吏部主事遷文選司郎中特  
立不苟時冢宰倚為左右手相國趙志臯為其子  
求兩淮鹽運三致書囑之昌期堅不聽沒後龍溪  
人祀之以為神

張輔之字爾贊太倉人萬歷丙戌進士歷任兵科  
給事時神宗深居禁內輔之疏請講學以鏡古知



今視朝以竭情盡下在垣四十餘疏西平李劉東  
征倭南討播皆有所論列御史曹學程忤旨擬  
辟輔之力爭得末減仕至工部尚書以魏璫用事  
乞歸

錢桓字握之太倉人萬歷己丑進士以御史出按  
畿南時邯鄲井陘間有大俠恣橫桓置諸法三輔  
震悚再按四川蜀中權酷四萬恒苦中人徵督爲  
虐桓割贖醵代之民用不擾後以僉都御史撫南

贛乞歸居鄉清謹人服其淳德

李先芳字茂實嘉定人萬歷己丑進士爲給事中  
屢有建白緬甸與土司構怨朝廷以二十萬衆征  
之先芳乞救邊臣毋敝所恃以事無用人皆躓其  
言仕至四川叅議卒嘉邑漕折之議先芳贊成之  
力爲多

王在晉字明初太倉人萬歷壬辰進士由中書爲  
浙江杭嚴道平劇盜罷雇運人德之遷浙江江

西布政使兩舉卓異歷官至兵部尚書經畧薊遼  
改南兵部尚書歷吏刑尚書坐事削籍歸所著有  
海防纂要通漕類編

陸獻明字君謨太倉人萬歷丁未進士爲御史按  
湖廣時僚屬以魏璫生祠請獻明叱之裂其牘楊  
漣死誣贓萬計令原籍追償獻明竭力全其家再  
按黔會水西酋作亂獻明上疏言當用重兵三方  
並進如其言水西平仕至太僕寺正卿

侯震暘字起東嘉定人堯封孫萬歷庚戌進士爲  
吏科給事僅八月疏三十餘上及客氏再入特疏  
請收回成命語侵魏璫上不省後以劾相沈灌結  
納中官爲魏璫所逐震暘陞辭復上田賦河渠  
二議竟落職歸

孫元化字初陽嘉定人萬歷壬子舉人好奇畧得  
西洋軍中火器法天啓末計偕上書當事授以贊  
畫之任時魏璫用事罷免崇禎初起官條上時政

十二事陞山東叅議整飭寧前兵備所用多闕  
東士卒所向克捷後巡撫登萊以兵變論死

李繼貞字散尹太倉人萬歷癸丑進士爲職方郎  
典山東試發策以漢唐閣寺爲問時魏璫方熾以  
謗訕削籍後起故官值登萊兵變督議主撫繼貞  
請調闕外兵以解登圍亂乃定繼貞在部久邊事  
益練習權倖以請託不遂喉論之三黜三起至僉  
都御史巡撫天津上五議大興屯田後除名復召

還道卒

徐憲卿字九亮太倉人萬歷癸丑進士由行人爲南給事中時三案議起憲卿疏論李可灼侍疾不謹宜按法論死又疏駕帖及北司拷訊之非會楊漣數魏璫二十四罪奉旨切責憲卿即上權璫罪狀一疏直糾魏客奸黨側目以奄敗得免仕至太僕寺少卿

時偕行字乾所嘉定人萬歷癸未進士歷知四縣

舉卓異爲御史疏劾大僚張位石星等出按晉中  
以汾宗繁橫抗議改州爲府旋奉譴歸臨終以遺  
金八百授子曰吾一生清慎所餘止此公塘爲州  
邑孔道民多病涉汝其築石梁以濟往來橋成至  
今賴之

朱邦臣字子貞太倉人以鄉舉知嶧縣時大饑民  
多嘯聚邦臣發庾賑之單騎往撫衆感泣歸業後  
補仙居會倭寇將至邦臣榜通衢稱客兵四集以

疑之賊度蒼嶺去其餘賊悉爲邦臣所擒調知黃  
縣免歸

黃世能字濟夫嘉定人以掾吏爲平涼衛經歷時  
靈臺縣賊聚衆殺傷官兵兵巡董國光以數百騎  
使世能覘賊世能曰覘賊多人彼以我爲挑戰遇  
鬪必死今以數人往賊不備乃可得其情國光嘆  
曰經歷知兵我不及也往果得賊要領歸遂擊破  
之以才委署安定會與司理楊某爭一重辟囚楊



理屈陰中之罷歸

趙洪範字元錫嘉定人天啓壬戌進士以御史出巡滇南時土酋普名聲叛洪範用間說酋腹心何天衢降遂反擊酋兵滅之

許國榮字允尊太倉人天啓乙丑進士選工科給事中時中人掌廠布邏卒調刺外事國榮上疏極論遂褫職在諫垣疏數十上多中時病

吳克孝字人撫太倉人以進士爲刑部郎恤刑粵

東平反幾百人尋備兵保定時保定盜賊抄掠者甚衆克孝至密擒其渠魁斬之羣盜遂散

沈廷揚字季明崇明人明季海潮溢出四千金助賑由國子生爲中書舍人會山東多警梗運道廷揚上書言海運之便上喜命造海艘試之僅半月而抵天津進戶部郎督海運事竣加光祿少卿

國朝錢增字哀卿太倉州人明季以進士爲兵科給事忠直敢言嘗劾樞臣楊嗣昌大帥王國光等侃侃

指陳不畏權勢年四十乞終養歸順治九年撫按  
以人材薦增以母老辭

張王治字無近太倉人順治丁亥進士知桐廬縣  
地當閩衝更調絡繹夫數不足王治即盛服曳舟  
以從督師者動色謝之擢工科給事抗言東南兌  
糧多額外浮費請設官收官兌之法及五米五銀  
之例從之又疏請開浚三江及江南分置藩臬皆  
允舉行

錢晉錫字方來太倉人康熙庚戌拔貢在禮垣時嘗疏免淮南鹽課三萬兩並止兩廣鼓鑄朝論避之康熙四十三年山左大祲流民賣入旗者淮發回晉錫時爲府尹按名給費兼檄所在舟車遞送所全活無算以終養歸

海州

漢徐璆字孟玉海西人父叔度遼將軍有名於邊璆自少博學舉高第稍遷荊州刺史舉秦南陽太

守張忠贓億萬又奏五郡太守及屬縣有贓汙者  
悉徵案罪威風大行中平元年與朱雋擊黃巾賊  
破之遷汝南太守轉東海所在化行被徵當詣京  
師爲袁術所劫授以上公之位璆示必死術不敢  
逼後拜太常

三國魏徐宣字寶堅廣陵海西人太祖辟爲司空掾  
歷丞相東曹掾文帝踐祚轉散騎常侍從至廣陵  
六軍乘舟風浪暴起帝船回倒宣凌波而前羣臣

莫有至者帝壯之遷尚書明帝以宣爲左僕射疏  
諫威刑太過又諫作宮殿窮盡民力手詔嘉納卒

諡曰貞

廉竺字子仲東海朐人祖世貨殖資產鉅億徐州  
牧陶謙辟爲別駕從事謙卒竺奉遺命迎先主  
於小沛後呂布襲下邳擄先主妻子竺進其妹爲  
夫人并僮客二千金銀貨幣以助軍資賴此復振  
益州平拜安漢將軍待以上賓之禮

宋胡松年字茂老海州懷仁人幼孤貧讀書過目不  
忘政和二年上舍釋褐累遷中書舍人時方有事  
燕雲松年謂邊釁一開有不勝言者弗時相意建  
炎間知平江府貪吏解印斂跡以興利除害十七  
事揭於都市百姓使之使金還拜吏部尚書權叅  
知政事以疾提舉洞霄宮卜居陽羨松年自持囊  
至執政所舉皆一時聞人秦檜秉政士大夫無不  
曲意阿附松年獨鄙之至死不通一書世以此高

之

明郇沔沔陽人洪武甲戌進士永樂中授給事中性  
警敏有幹才機事慎密受知成祖歷官鴻臚少  
卿卒

錢貴海州人襲職指揮使謀畧過人宣德中遷都  
指揮僉事管領京營操練有法士卒悅服累擢中  
軍都督府同知爲人謙恭不以富貴驕人

王璟海州人正統己未進士祖規仕至叅政有清



直聲璟少承家學博極羣書規於本鄉奏築堤防絕海潮泛田之害璟又題免東海養馬再世遺愛鄉人德之

丁泰字時亨海州人正統辛酉舉人授戶部主事立朝以剛正自持人呼爲鐵面丁後謫判興化賑歲饑弭虎患歷有善政

乙瑄字崇璧海州人成化丙戌進士授吏部文選主事擢禮部郎中轉山西叅議有清操巡視大同

等處恩威兼著邊徼輯寧歸後無屋以居

陳秉彝沭陽人成化戊戌進士官四川忠州守清  
慎愛民忠州人塑像祀於陸贄祠

楊宏字希仁海州人以蔭叙襲指揮使弘治己未  
檄守紅城尋守備固原獻策於總制楊一清築邊  
牆數百里掌陝西都司平漢南盜累遷總兵官鎮  
松潘斬番酋雪郎王之久爲邊害者至嘉靖初節  
鎮淮揚督理漕運聲績偉然著有漕運志

邵思忠字廷臣贛榆人由鄉貢起家爲商城令釐  
奸祛弊簡靜不擾擢戶部主事督權潞壘大同清  
節尤著

徐鸞沭陽人弘治甲子舉人任湖州府同知居官  
惠愛持身清約部民咸翕然感化

胡璉字器重沭陽人弘治乙丑進士以刑部郎中  
遷閩粵二省兵備時島寇佛郎機牙掠海上璉選  
鋒猝入奪其火器遂爲中國所用因號佛郎機累

擢巡撫以戶部右侍郎致仕遇征安南薦起督餉  
卒孫應嘉世宗時官都給事中曾孫一炳以行義  
著鄉里

裴天祐字順之贛榆人嘉靖庚戌進士令建安爲  
政務寬厚巡按山東權貴囑其劾去屬吏某廉知  
其賢反優獎之罪人挾重賂求免死沒其金於官  
寘之法歷官大理卿所著有拙逸亭稿

張朝瑞海州人隆慶戊辰進士州有倭警捐貲以

助築城令鹿邑清衛豪侵官地七千餘頃擢守金華歲饑設法賑濟全活甚衆葺書院市腴田二千餘畝以贍師儒叅政杭嘉湖抗疏陳礦役之害後攝府尹卒

倪文純字青杜海州人以歲貢官壽州訓導禦流寇有功又單騎說降屯英霍潛太諸賊漕撫史可法薦之擢太和令

葛維垣字映辰沭陽人崇禎時以進士授成都府

推官鞠獄多所全活丁丑冬流寇薄城力請援兵  
大破賊衆解省會兩月之圍攝守重慶豪猾懾服  
擢工部主事旋授吉安知府

通州

宋王惟熙字國和泰州如臯人景祐進士擢大理寺  
詳斷官持法堅正務原人情奏案成廷尉使易之  
不從儂智高反掠嶺南諸州吏棄城者皆坐法惟  
熙議嶺南兵與城皆無足恃奈何以常法置之死

上亦憫之皆得免累官司封員外郎

吳及字幾道通州靜海人以進士累遷太常博士  
時仁宗春秋高及上疏言古聖重絕人世宜禁擅  
宮童幼聖嗣必廣帝異其言又言宜擇宗室子以  
備儲副嘉祐中擢祕書閣校理改右正言奏論孫  
沔苛暴不法龐籍輕動改衎在職數年以勁正稱  
出知廬州徙桂州卒

王覲字明叟嘉祐四年進士熙寧中爲編修三司

令式刪定官覲不樂居職求潤州推官二浙旱郡遣吏視苗傷不敢多除稅覲覆按盡除之哲宗立擢右正言疏論蔡確章惇韓縝張璪朋和害正章數十上相繼斥去又劾竄呂惠卿論青苗之害乞罷新令復常平舊法時起洛蜀二黨之議覲深破其說上然之出知成都府江水貫城中爲渠歲久湮塞苦霖潦覲疏治復故民德之號王公渠王俊義字堯明覲從子以太學上舍就試徽宗親



擢第一蔡京邀使來見謝不往授國子博士後召  
爲館職爲王黼所惡以直秘閣知岳州卒俊義與  
李祁友善首建正論於宣和間諸公卿稍知分別  
善惡邪正兩人力也

印應雷通州人嘉熙中進士選知和州時北兵來  
侵和危甚應雷入守卒保其城後温州卒作亂改  
知温州應雷單騎赴任賊來覘者捕斬其魁餘黨  
悉散咸淳六年爲兩淮安撫制置使知揚州卒贈

端明殿學士弟應飛亦進士累官戶部侍郎

明李儼字民瞻泰興人洪武元年充都督府斷事論  
輔治三計陞刑部侍郎宣諭陝西還加戶部尚書  
賜一品服金帶令從奉天殿服之以出學士宋濂  
等送歸第卒於官

翟善字敬夫泰興人洪武中選入國子監授吏部  
主事超拜侍郎尋進尚書時初罷丞相以六部  
分政吏部爲百寮長善當重任被顧問凡所奏

議皆稱旨嘗欲爲善營第於里中善曰江鄉地  
隘宗親且衆誠不忍奪人自益又以善家戌籍欲  
免之善曰今區宇初定戍卒宜增豈可以臣破例  
太祖善之

李敬初名鴻漸通州人洪武初以文學徵授刑部  
尚書守法度修政事已致仕歸十四年復召爲祭  
酒是年始行釋奠先師禮從敬請也

邵旻字天民通州人永樂甲辰進士嘗謁陵讀

碑文一過成誦同儕異之不知其方誦時已目他碑又能成誦矣授評事數折大獄巨璫貴戚受賄撓法旻堅持不可犯遂坐忤落職

顧雄字時俊通州人成化辛丑進士授戶部主事犒軍大同監守者欲餌以利怒却之督江西福建逋稅時例徵糧長紙價供筆劄費雄革之事竣以病乞歸囊無餘資鄉人稱爲清白吏

邵崇字民愛通州人成化丁未進士知崇慶州擢

南戶部郎陞湖廣叅議治奸民謹諫入興邸事不  
縱不苛轉陝西左叅政陝劉瑾故鄉也騷屑太甚  
又大索官人賄索曰奈何用百姓膏脂博高列乎  
遂移疾歸部使者交薦不起時稱其儒而迂吏  
而不俗

馬繼祖字崇功如臯人弘治庚戌進士累遷南京  
監察御史有二臺長文閱繼祖劾免之臺中肅然  
後以忤劉瑾勒致仕

張羽字鳳舉泰興人弘治丙辰進士授淳安知縣  
有惠政擢御史彈劾中貴疏論時事甚剴切巡按  
雲南奏免開礦及中官怙勢者出守保定以母疾  
乞歸復起爲河南布政使

凌相字忠甫通州人弘治己未進士歷官廣東兵  
備僉事勦平惠潮大峯嶂劇賊陞苑馬寺卿署  
分巡事督造邊城包山於城內以絕窺伺遷四川  
布政使轉雲南擢副都御史巡撫湖廣告歸第楷

字端甫正德戊辰進士以戶曹監兌江西歸途遇盜囊篋空空盜歎服而去

姚繼巖字元肖通州人弘治壬戌進士歷工刑二部主事遷考功郎中以清苦稱武宗銳意南狩巖偕部曹聯章懇留受杖未幾陞太常少卿創發竟死

何崇字愛之秦興人正德辛未進士歷官郎中諫武宗南巡廷杖尋陞廣平知府減種馬治大豪民

大悅服嘉靖初錄諫南巡諸臣加從三品俸以疾告歸

張聽字鴻舉秦興人正德甲戌進士授禮部主事諫南巡受杖謫知海鹽縣歷官副都御史巡撫延綏凡三奏捷賜金幣進戶部侍郎致仕

崔桐字來鳳海門人正德丁丑進士第三人授編修諫南巡詔跪午門外五日廷杖奪俸嘉靖初諫大禮復逮詔獄再予杖出補湖廣叅議備兵辰沅



平安化山寇賜金幣進南太僕卿建議薛瑄從祀  
拜禮部左侍郎致仕著東洲正續集

錢錄字宗政通州人以例貢授松陽縣丞縣故有  
銀冶盜竊發因剽掠爲患錄曰此禍穴也錮之火  
其旁廬舍以杜覬覦督兵捕閩寇生得其渠魁境  
內以寧事母至孝母病割股以療子嶸

錢鐸字振之海門人正德辛巳進士授刑部主事  
嘉靖初諫大禮杖闕下出守肇慶府改學校倡文

教移知鄖陽擢廣西按察副使備兵府江生縛賊  
首諭降三洞蠻以剛直中蜚語罷

黃河字汝清通州人嘉靖壬午舉於鄉授滕縣教  
諭陞南國子助教擢南京貴州道御史河套議起  
河與曾銑合忤貴臣詔廷杖未幾遷雲南僉事有  
殲寇功

馬坤字順卿通州人嘉靖癸未進士累官湖廣副  
使接壤川貴苗寇兵連數歲坤叅贊督撫平之陞

河南布政使河南多宗室歲廩不繼輒恣橫犯法  
坤申嚴約束祿以時給皆悅服擢南戶部尚書嘉  
靖末召坤於西苑問錢穀歲入幾何坤一一條對  
前後所上凡三十二事多見施行

李夢周字希道海門人嘉靖癸未進士授寧都知  
縣俗好鬼祠五王廟歲市子女代牲夢周火其廟  
併毀諸淫祠撤故材以新學宮及構書院集諸生  
講習其中有勢家橫里中捕置於理籍所奪田歸

之民遂爲所中傷解綬歸

錢嶸字君望通州人嘉靖壬辰進士授永平推官擢御史巡按廣西時靖江王僻處自恣爲奸民藪嶸悉捕置諸法遷廣東副使以平黎功賜金幣陞浙江叅政清諸郡徭法病歸通沿江海不宜馬牧自永樂時撫臣以六安州災荒暫爲代養相沿不革歲徵馬價折色銀三千餘兩民大困嶸上疏罷之

陳堯字敬甫通州人嘉靖乙未進士授工部主事  
治清江浦鑿黃河上游避淮口以達清江累陞貴  
州按察使三殿災役民採木堯爲更番之議以紓  
民力御史奉詔採丹砂又議開永寧銀池堯皆力  
持之陞廣西左布政裁省靖江宗人虛祿以萬計  
進副都御史督漕河高郵湖隄屢壞堯樹木實茭  
捷以代石堤遂固時黃河徙道漕艘皆膠淤堯遣  
水工探刁陽湖得故漕道舟以通行尋致仕歸

袁隨字民悅通州人嘉靖丙辰進士授戶部主事  
嚴嵩當國欲羅致之餌以銓司不應出知德安府  
歲薦饑隨不動官帑多方賑卹全活甚多擢山西  
提學累陞四川左布政忤張居正罷歸

錢藻字自文如臯人嘉靖己未進士出守廣信有  
汰卒三千肆剽掠當事議啗以金藻第先聲厲兵  
以待卒無敢犯境者用贖鍰廩給貧士累遷密雲  
兵備晉左叅政修築古北口諸塞擢南光祿寺卿

請裁一切冗費終順天府尹

顧養謙字益卿通州人嘉靖乙丑進士歷官福建  
僉事備兵薊鎮巡撫遼東邊備修舉嘗按塞憩  
小凌河敵騎十萬猝至養謙啓四門張蓋坐敵不  
敢近而退遷南京戶部侍郎總督薊遼兼經畧  
以議倭封貢事被劾求去卒贈兵部尚書

陳大科字思進通州人隆慶辛未進士授河南推  
官召爲給事中歲旱上弭災六事歷陞太常卿疏

救李獻可等言事被譴大璫馮保以罪間住南京  
乞赦還鄉大科論其懷奸窺伺總督兩廣安南黎  
莫二姓交兵大科請於朝布恩信以招徠之皆請  
納代身金人謝罪晉都御史卒贈兵部尚書

袁九臯字君鳴通州人萬歷己丑進士授鉛山知  
縣擢御史巡按山西浙江河南順天四省所至著  
風節中旨遣官權取煤稅三疏諫止擢太僕寺少

卿



范鳳翼字異羽通州人萬歷戊戌進士除戶部主事監南新濟陽二倉酌放軍糧清核所積米計六十萬得免浥爛改吏部考功汰墨吏進名臣顧憲臣高攀龍等爲時所忌歸

彭大同海門人以歲貢爲叙州推官有孝廉殺人臬司推門望罰金三百鍰釋之大同怫然曰殺一人罰三百金將挾萬金而殺三十人乎竟擬辟又民有修怨仇家乘父老病扶至河壩挑其仇毆之

立斃訊者但論仇人死大同判曰欲甘心於仇因  
忍視其父河壩之死誰則致之并坐子如律

李之達字武東海門人由舉人選巨津知縣上官  
竒其才令攝五篆時巡撫開福龍鹽井達爭之曰  
增一時之課商必虧額乃寢陞興化府丞有奸弁  
利嫂姪貲巨萬上官授之意令以貲歸弁達不聽  
尋去官

冒夢齡字汝九如臯人以選貢授會昌知縣移知

鄴都奢寅變起與石柱司女將秦良玉協力破賊  
城賴以全量移寧州歸子宗起崇禎時以進士爲  
兗西僉事監軍河上張獻忠破襄陽調襄陽監軍  
時賊數十萬往來窺伺城中虛無人宗與左良玉  
收合餘燼力保巖疆以功被上賞量調寶慶歸所  
著有拙存堂集

朱一馮字非二泰興人以進士知信陽州節省公  
費銀辦開礦採木諸役民不知擾革夫馬雜支積

弊舉卓異陞兵部郎歷職方武選出任八閩從臬  
藩至巡撫定亂福寧平賊汀州天啓間所在立魏  
璫生祠馮獨不爲立罷官

國朝孫閱達字天士通州人康熙甲辰進士知太原縣  
愷悌得民兩造赴庭閱達懇切誨諭多罷訟而去  
以病歸士民追送百里外生平著省身錄日所爲  
夜必檢記魏象樞亟稱之

徐起霖字傳巖通州人由前明副榜任邵陽知縣

盜劫某官捕不獲起霖出獄囚遍閱之得三人曰  
得盜貸汝死縱之去如期而盜悉獲人驚爲神知  
陝西徽州詳免練餉加派遷真定知府時用兵滇  
南真定當孔道承辦供億不以累民



江南通志卷一百四十五

欽定四庫全書

史部

江南通志卷一百四十六

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卜維吉

謄錄監生臣繆瀛

欽定四庫全書

江南通志卷一百四十六

人物志

宦績

安慶一府

安慶府

漢朱邑字仲卿廬江舒人少爲桐鄉嗇夫廉平不苛  
以愛利爲行未嘗笞辱人存問耆老孤寡吏民愛  
敬焉遷太守卒史舉賢良爲大司農丞遷北海



太守以治行第一入爲大司農多薦賢士大夫居處儉節祿賜以共九族鄉黨病屬其子曰我故爲桐鄉吏其民愛我必葬我桐鄉民果爲邑起冢立祠歲時祭祀不絕

三國吳陳修廬江松滋人陳武子有父風年十九孫權召見拜別部司馬授兵五百人時諸新兵多有逃叛修撫循得其意不失一人拜校尉建安末追錄功臣後封都亭侯爲解煩督

陳表字文興武庶子少知名侍東宮徙太子中庶  
子拜翼正都尉修亡後表母不肯事修母表勸以  
大義二母感悟雍穆表以父死敵塲求用爲將領  
兵五百人傾意接待士樂爲用無難士施明盜官  
物廷尉收考極毒無辭表誘之乃首服遷無難右  
部督封都亭侯以繼舊爵表皆陳讓乞以傳修  
子延不許嘉禾三年領新安都尉料取所受賜復  
人戶以充部伍廣開納降得兵萬餘人鄱陽民吳

遽等爲亂表越界討破之拜偏將軍進封都鄉侯  
家財盡於養士及卒妻子露立太子登爲起屋宅  
子教年十七拜別部司馬教卒修子延復爲司馬  
代教

晉何充字次道廬江灑人成帝時爲東陽太守會稽  
內史甚有德政除丹陽尹王導庾亮並薦充器局  
方槩有萬夫之望必能總錄朝端願引充內侍由  
是加吏部尚書歷中書令建元初都督徐州揚州

入輔幼主臨朝正色以社稷爲己任卒贈司空諡  
文穆

何澄字季懸起家秘書郎清正有器望卒贈金紫  
光祿大夫

南北朝齊何昌寓字儼望廬江鬻人少清靖爲建平  
王景素府主簿以夙素見重出爲湘東太守景素  
被誅昌寓啓太祖直其冤太祖嘉其義復爲南郡  
太守行荊州事臨海王昭秀將被害以昌寓得還

京師歷官吏部尚書復爲侍中卒贈太常諡簡子  
昌寓不雜交遊通和汎愛歷郡皆清白士君子多  
稱之

梁何敬容字國禮昌寓子初爲建安內史清公有美  
績普通中守吏部尚書銓序明審號爲稱職出爲  
吳郡太守勤恤民隱辨訟如神治爲天下第一遷  
尚書右僕射叅掌選事久處臺閣詳悉舊事聰  
明識治勤於簿領嘗奏侯景終當亂國其言卒驗

子穀祕書丞

唐張鎮周舒人武德八年爲本州都督就故宅多市酒肴召親戚酣飲如布衣時凡十日既而分贈金帛泣別曰今日鎮周猶得與故人聚明日則舒州都督治百姓耳自是親故犯法一無所縱境內肅然

宋王罕字師言珪之季父自成都徙舒州以蔭知宜興縣縣多湖田歲訐水輕重失其平罕躬至田間

圖其高下衆莫能欺范仲淹在潤奏下其式於諸道遷戶部判官出爲廣東轉運使儂智高入寇罕行部在潮廣州守仲簡自圍中遣書邀罕罕遂還惠州簡卒三千順流而下至廣營於南門智高見其嚴備遂解去以功爲西路轉運使徙知潭州爲政務適人情不加威罰仲狂婦之冤郡人傳爲神明監司上治狀勅書褒諭賜絹三百

王琪字君玉珪之從兄兒童時已能爲歌詩起進

士調江都主簿上時務十二事仁宗嘉之通判舒  
州歲饑奏發廩救民未報先賑以公租守以下皆  
不聽琪挺身任之徙知江寧先是府多火災或託  
以鬼神人不敢救琪捕得姦人誅之火患遂息以  
禮部侍郎致仕琪性孤介不與時合數臨東南名  
鎮政尚簡靖及葬真州詔真揚二州發卒護其窆  
蓋異數也

潘琛宿松人嗜學寒暑無間由進士爲祁門丞教



崇禮讓士民化之

元虞執中字伯權望江人至元間鄉貢第一成進士授將仕郎居官恪謹公事無滯山南憲府多獎進之

明黃敏字宗學桐城人洪武初以歲薦歷官兵部員外郎奏罷糧運不便者數事以忤旨左遷上林監丞陞長蘆鹽運副使鹽弊肅清有好菴以私販事誣敏謫戍興州以朝臣薦復遷工部主事擢廣西

按察司副使威惠並茂有古憲臣風

劉燾字尚載太湖人洪武間以明經知柳州府歷  
嘉興寧波西安長沙彰德汀州咸有政績爲治寬  
厚慈祥不施鞭扑有不法者但勸諭之人皆感化  
官至雲南叅政柳州長沙咸立祠祀之

呂衡字仕平太湖人洪武間歲薦授監察御史遇  
事敢言巡按廣東風裁甚著貪墨皆望風解印  
綬去

劉瑩字仲璠桐城人永樂癸未進士官御史歷永  
平廣平二郡守爲政平易人歌曰太守政平二郡  
皆寧

饒政字文質望江人永樂乙未進士運糧江西既  
竣役同事十三人分別授御史僉事政上章願授  
教職上可其請先後四任學博凡二十年造就諸  
士皆一時名臣年八十歸里

程旼字太和桐城人宣德丙午舉人任磁州同知

時蝗大發改虔禱於神忽禿鷲飛集啄蝗殆盡因  
以有聲改滄州值旱改禱於五龍井有白魚五出  
見雨大注歲遂稔民共立五龍廟肖像祀之

吳昇字亨晦懷寧人宣德癸丑進士擢工科給事  
中遇事敢諫封駁糾正有聲於時正統時廷議郡  
縣守令用大臣薦昇謂受官公朝拜恩私室不可  
又議大臣舉御史昇謂御史既被大臣舉則大臣  
有不法恐御史瞻顧私恩咸奏止之閩浙礦徒爲

亂擢昇浙江布政司叅議往輯之昇捕斬渠魁撲滅黨與且廉其失機都指揮以下數人寘之法衆皆股栗賊遂屏息

姚旭字景陽桐城人景泰辛未進士官刑科給事中敷奏詳明直聲大著謫判鄭州清慎自勵擢南安守盡心民事尤以學校爲先終雲南叅政

方佑字建輔桐城人天順丁丑進士擢監察御史風裁疑峻初按河間錦衣官校素怙寵爲奸聞佑

風皆惴惴聽命有盜殺縣簿捕弗獲設計襲誅  
之移按蘇浙鹽政再按廣西有平苗賊功後忤中  
使廷杖謫知攸縣補桂林知府

王道字懿德潛山人天順己卯舉人任杭州通判  
威惠並行以梗介忤直指使者即挂冠歸直指追  
檢其舟中惟敝簾盛書數卷乃慚謝道更以野服  
拜辭直指知意不可奪嗟嘆久之成化間有盜經  
其家借炊焉曰知廉吏無他求也

王瑞字良璧望江人成化己丑進士授吏科給事中在文華殿抗言內寵滋甚上震怒不懾晉都給事中劾倖進者多攀緣超越濫竊名器上嘉納詔吏部貶四人奪九人官凡居言路十五年疏諫皆朝廷大事遷湖廣叅議告歸

方向字與義桐城人成化辛丑進士授南戶科給事中巨璫守備南京甚跋扈乃疏劾其罪狀并文武大臣十數人璫銜之因事誣逮下獄貶雲南驛

丞歷官瓊州知府地產珠僕私市其一索而投之  
於海

蕭世賢字若愚桐城人弘治乙丑進士任刑部郎  
中執法不撓獄多平反出守嘉興歲革羨金千  
餘不染一塵立三館以造士文風蔚起擢湖廣副  
使去道卒囊無餘貲以故服殮

李楫字濟之懷寧人弘治乙丑進士爲監察御史  
按山西搜別宿弊忤當道謫判沔陽移泰和令從



王守仁平逆濠歷遷貴州叅議時芒部弗緝楫贊臺臣往征之賊平錄功尋乞歸

錢如京字公溥桐城人弘治壬戌進士選監察御史所至有真御史名正德時累擢至都御史巡撫保定等府歲大饑請發內帑數萬緡賑濟民賴以生轉兵部侍郎提督兩廣軍務所轄土官多相仇殺獄未決疏請褫土官職許立功自贖兵不血刃地方以寧晉刑部尚書告歸卒之夕有大星隕於

城中事聞加太子少保諭祭葬

李淳字元樸太湖人弘治壬戌進士任行人擢刑科給事以忤劉瑾轉浙江僉事浙東盜起淳督兵勦捕之會有星變出揚州分淳曰杭必有災令民間儲水以備已而杭城果火得無患調廣西按察值撫江土徭及苗民讐言殺淳討平之

余珊字德輝桐城人正德戊辰進士由行人擢御史忠直敢言不避權倖以發中貴人奸賕譖之下

獄杖幾斃謫判安陸州嘉靖初起江西僉事討平  
梅花峒賊應詔陳十漸疏共萬四千言最爲剴切  
珊律已清嚴居官有威惠累遷四川按察使卒

齊之鸞字瑞卿桐城人正德辛未進士官給事中  
疏禦邊弭盜深切時務武宗自稱威武大將軍朱  
壽之鸞切諫又欲南巡之鸞首唱留駕率同僚伏  
闕號泣上意始沮王守仁平宸濠許泰忌其功誣  
毀百端之鸞力白之世宗時遷寧夏僉事值歲饑

民採蓬子爲食乃封蓬子進於帝乞發帑賑之還  
朝夏人遮道號聲不絕歷遷河南按察使卒於官  
著有蓉川集入夏錄

吳檄字用宣桐城人正德辛巳進士少有氣節初  
授襄陽推官決疑獄賑饑民綽有能聲遷兵部武  
選郎中有都督僉事姜奭奏邊功議陞職方議可  
乃下武選擬官檄曰法斬首二百上者陞一級奭  
未滿八十當賞不當陞有劉民譽者其父從世宗

起興藩賜錦衣衛指揮民譽欲襲職檄曰法非汗  
馬不世安得襲大司馬張讚固欲與之檄固不肯  
讚自爲劄請詔不許檄亦以是外補耿介之操始  
終如一子自峒歷官太常卿有清望

盛汝謙字亨甫桐城人嘉靖辛丑進士授行人擢  
御史按關中歲饑民嘯聚爲寇汝謙設糜賑之計  
擒倡亂者數人餘黨遂解遷光祿卿嚴嵩柄國獨  
守正乞歸嵩敗累擢操江僉都御史南京貢院號

舍故用蘆葦汝謙捐俸修拓甃以磚轉戶部侍郎  
歸與吳一介倡議築桐城城後流賊之亂桐得保  
全

徐桂字子芳潛山人嘉靖乙未進士知鄖陽府治  
有寺妖僧緣爲奸婦女佞佛者多墮其術桂得其  
情親詣寺縛主僧勘鞫立除之焚其寺鄖陽數十  
年巫風一旦盡革

戴完字仲修桐城人嘉靖甲辰進士官戶部主事

分司德州改刑部郎嚴嵩用事重其名欲致私  
謁竟不往會同部郎張紳上疏劾嵩杖戍夜郎嵩  
偵其疏與完合草遂出補貴州僉事時盜賊屢發  
土官跋扈完杖之而以恩撫其子乃畏服在任三  
月威德大著謝病歸

趙鉞字鼎卿桐城人嘉靖庚子鄉試第一甲辰登  
進士累官至僉都御史巡撫貴州值土舍韓甸攫  
司印逐正官糾黨稱兵三省騷動鉞督總兵等官

會勦之又爲黔奏便宜六事皆議行焉

於惟一字德夫懷寧人嘉靖癸丑進士任南工部  
主事守關嚴慎適上所寵方士陶仲文欲轉關夜  
出惟一繫其行舟時陶焰方熾大爲沮喪御史吳  
時來叅嚴嵩被謫出都惟一獨祖饑嵩銜之出守  
太原值歲荒民相食捐俸賑饑民得全活衆相呼  
爲於家兒擢陝西副使

金燕字尚賓潛山人嘉靖癸丑進士謁選桐鄉令



時海寇猖獗桐鄉濱海無城燕下車卽爲營築城  
成而寇至環攻四十餘日寇遁復設奇追殲之擢  
禮科給事中力詆嚴嵩奸謫彛陵判後仕至尚寶  
丞

阮自嵩字思竹桐城人嘉靖丙辰進士官刑部執  
法不徇屢觸權要嚴嵩父子銜之謫判沔陽以官  
銀抵逋負脫二百餘人於獄又清景藩閹豎所奪  
民田致干叅奏世宗原其無罪再判濮州均治河

苦役民戴之後復忤當軸以滄州守歸

吳自峒字石蘭檄子嘉靖壬戌進士授行人以清  
望選翰林待詔充裕王講官正色開陳穆廟即位  
以青宮舊屬擢尚寶卿尋選太常寺卿自峒素  
與張居正善及居正柄政訖無一字相通旋以外  
補遂歸

李彥字龍陽望江人嘉靖辛酉舉人任台州別駕  
歲饑典賑事活數萬人窮民鬻妻輸稅彥爲贖完

之有以孝聞者三式其廬擢漢中守屬鳳邑履畝  
主度除荒糧五百石有奇

吳肇東字敬堂懷寧人隆慶戊辰進士知桂林府  
愛民如子猛獍頑梗者咸稽顙庭下擢福建按察  
使將晉浙撫會張居正奪情凡官閩者皆弔唁肇  
東獨不遣因謫長沙遂歸

張淳字希古桐城人隆慶戊辰進士知永康縣吏  
民狡黠前告罷七令淳至案牘委積剖決如流

吏大駭服舉治行第一授禮部主事歷郎中張  
居正母死諷淳往祭乃謝病歸後起知建寧府歷  
陝西布政尋致仕優游林下廿餘年邑有重務力  
爲民請澤遍鄉里焉

劉尚志字士行懷寧人隆慶辛未進士授歸善令  
尋擢諫垣張居正柄國繩下嚴尚志上緩刑一疏  
歷任江西少參浙江海道選將練兵爲防倭計甚  
悉按察福建轉山東左右布政致仕歸睦嫻任恤葬

父躬壘負石哀聲徹林谷墓木生連理枝咸稱  
孝感

盛世承字以烈桐城人萬曆丁丑進士以部郎出  
備兵大同時邊事旁午世承馭以鎮靜威信著聞  
轉陝西右布政蘭州機戶疲於貢絨世承力蘇之  
擢四川左布政會有事於播播平又爲善後策蜀  
人賴之病免再起以原官備兵陝西按行部中墾  
河灘荒地至千餘頃爲秦中世世之利晉光祿卿

璫禍削職

任可容字子賢懷寧人萬曆丁丑進士官處州守屬邑有以香葦進者中匿金可容懲解役遣之遷惠潮道嚴飭武備壁壘改觀一創倭於碣石再創倭於南澳有出海船三十餘隻詐稱總督家丁可容盡逮置法又於南澳擒洋商五十四人總督誤作賊可容力白其冤釋之

葉隆光懷寧人萬曆庚辰進士官吏部郎疏諫早

定國本削籍歸卒光宗立詔求當日言事獲罪諸  
臣贈太僕寺少卿

徐堯莘潛山人萬歷丙戌進士歷荊州守中官陳  
奉開礦沙市掘塚濬室道路以目堯莘約其驕從  
不得逞劉大將軍縱征播調兵數省途出自荆民  
爭避之堯莘爲經紀民獲安堵上嘉其勞晉廣東  
按察擢撫延綏不果赴與無錫顧憲成交密袁宗  
道以不言而躬行稱之

方大美字黃中桐城人萬歷丙戌進士授常德推官多所平反擢御史巡按江西整飭吏治尤好士培植甚多轉按河南捐俸賑荒全活萬人終太僕

寺卿

楊材字遜生懷寧人萬歷己丑進士爲戶部主事給散京城各衛軍餉前官多侵牟材秉公散給懼聲動地遷吏部考功以執法忤當軸遂歸光宗立起太常卿轉左通政



吳用先字體中桐城人萬歷壬辰進士由臨川令累官都御史巡撫四川時播州亂大將劉綎以議餉不進用先躬率師先之督綎合戰戮力勦撫數月蕩平尋謝病上憫其勞特賜考績予告家居八年起少司空改樞貳總督薊州建防禦十策殫力籌畫會璫禍起致政歸

金忠士宿松人萬歷壬辰進士爲御史劾奸弁袁守時中貴邢隆立疏寢稅銀十五萬江南民獲更

生巡按貴州浙江河南三省定水西討路苗降思  
南賑恤無告招撫流移後因建言忤旨左遷福寧  
道陞按察司備兵榆林擢右藩撫延綏尋卒於邊  
諭祭葬贈卹

胡瓚字伯玉桐城人萬歷乙未進士授都水主事  
分司南旺兼督泉牘泉司駐濟寧泗水所注瓚修  
金口壩過之時議徵稅濟寧力言不便而止累擢  
江西右叅政告歸

何如寵字康侯桐城人萬歷乙未進士由翰林歷  
祭酒宗伯以言事受知晉東閣大學士寬博坦白  
爲正人所歸體素弱遂稱疾乞休後復以元輔召  
固辭所陳奏獨以培元氣達大體爲務卒贈太保  
諡文端

何如申字仲嘉桐城人萬歷乙未進士授戶部主  
事時尚書趙南渚加意率屬諸曹郎出署往往偵  
其所爲獨如申鍵戶咨討本曹故實趙公嘗語人

曰吾安得郎盡如何者督糧遼東措置有方擢  
處州守諸衛士號泣攀轅大中丞疏留之竟得請  
又三年以叅政分守嘉湖累轉浙江右布政以病  
歸圖書外無長物

馬孟貞字泰符桐城人萬歷戊戌進士由分宜知  
縣擢御史孤立不避強禦如摘制科之弊剪左道  
之惑陳僉商之害辨代藩之立爭福府之田疏凡  
百七十八上直聲振一時出爲廣東副使不赴天

啓初起太僕少卿

姚之蘭字汝芳桐城人萬歷辛丑進士爲海澄令  
開九都水利化斥鹵爲膏腴居人德之遂名其地  
曰姚港累官杭汀兩郡守汀地僻民瘠適朝議加  
餉乃搜府庫藏所餘者佐以贖義新餉五千金完  
如額不以累民督餉使者以聞將起擢乃念母老  
請終養詔許之上嘉其急公愛民晉秩副使以榮  
其歸焉

吳應琦字景韓桐城人萬歷甲辰進士擢監察御史巡按雲南威惠遠播補浙江道按順永保河諸璫相戒勿犯累官南京大理卿

馬人龍字霖雨太湖人萬歷甲辰進士授戶部主事以犒邊奏績權潯江稅賈人德之爲立生祠遷粵西桂林道苗徭大訐人龍修戰艘繕城郭禦之轉楚右藩有楚才錄蕉園草行世

倪應春字申之桐城人萬歷丁未進士累擢御史

敷陳皆軍國重計光宗賓天引春秋世子不嘗藥  
正紅丸之罪李選侍移宮羣議鼎沸乃上仁義兼  
盡疏及楊漣去國復抗疏保留一時歎其正直晉  
太僕卿璫禍起削奪回籍

姚之騏號渥源桐城人萬歷丁未進士方正尚氣  
節力學篤行仕湘潭令潔已愛民治績顯著以勞  
瘁卒於官

何早字白夫懷寧人萬歷癸丑進士巡視下江適

璫李明道督淮漕建議民運早力陳其不便疏爭  
之削籍去懷宗初銓部交薦有鯁直端方之旨賜  
歸里

黃文星字辰北潛山人萬歷癸丑進士知同安縣  
甫一月颶風發民居幾盡文星輟訟一載復其廬  
舍調清豐治績益著擢駕部郎勤瘁卒於官櫬  
歸空橐而已

方大任字玉成桐城人萬歷丙辰進士由元城縣



令擢監察御史會魏忠賢墳塋越制特疏糾之削籍懷宗時召還陞都御史

方孔炤字潛夫桐城人萬歷丙辰進士知嘉定州發奸如神忤上官調福寧所至有聲入爲職方郎會魏忠賢欲封其兒子良卿爲伯固執不覆遂削籍懷宗初起尚寶卿巡撫湖廣時張獻忠寇掠總理熊文燦主撫議孔炤上八策極言招撫之誤與賊遇凡九戰八捷後以香油坪之敗爲楊嗣昌所

陷天下寃之旋得白以河北屯田御史解職歸  
姚孫槩桐城人天啓壬戌進士初令龍游請停商  
稅商民祠祀焉再補泉之晉江地瀕海爲鹹潦所  
淤飢民流離孫槩捐募糴穀以賑全活數萬擢西  
臺章奏悉中時弊

左光先桐城人光斗弟天啓甲子鄉薦知建寧縣  
以異績入西臺按部兩浙勤恤民隱周覈官方疏  
凡百餘上悉報可生平不避艱險偉烈直聲與兄

齊名

汪游龍字六御懷寧人崇禎辛未進士知廣東靈山縣接壤交趾蚤戶黎人時煽爲亂游龍至練兵設險民賴以寧調番禺值海寇劉香老入犯親決戰不避矢石香老卒成擒擢御史按閩時黃道周以劾楊嗣昌被謫力疏救之卒於官僚屬往殮惟敝衣數襲咸爲泣下

顏渾字伯通懷寧人崇禎庚辰進士爲吏部主事

憤要津持銓司短長乃倣范仲淹百官圖分註小冊遇有囑託者即發冊示之見者慚沮予告歸囊橐蕭然

雷縝祚字介公太湖人崇禎庚午鄉薦爲刑部主事每臨鞫悽慘形於色多所平反皖荒人相食疏請蠲恤里中賴以全活

王之慶字修祐望江人崇禎時貢生除福建尤溪令政成卓異因親老致仕當流寇披猖之慶糾集

鄉人立社保聚屢著戰功歿與左光斗雷縉祚並  
祀曰三賢祠

宋儒字文卿望江人初爲弟子員及長仕錦衣衛  
千戶典告密錦衣在明爲近侍可立取富貴儒獨  
廉惠凡死獄必求其生囚故無藉卧輒僵死儒奏  
以牧象草藉之囚繫者缺食又奏以無主盜贓食  
之遂定爲例歲甲子鄰弗戒於火焚燬畧盡儒棲  
獨存戊寅鄰又火亦如之蓋隱德之報云

姚孫棐字戊生桐城人崇禎庚辰進士令蘭溪民  
漕苦南米一項孫棐力請兩臺具疏改本爲折勒  
石永利調繁東陽臨城被圍馳走深山招集義勇  
乘懈擊敵東陽得保尋解組歸

左國柱字碩人光斗長子光斗死璫禍國柱以藐  
孤重繭數千里具血疏伏闕號寃得昭雪復官賜  
祭葬襲蔭以副榜令浙之武康邑白糧久爲屯丁  
侵攬勒索無休國柱力請官宥民困得蘇如出湯

火惠政多端至今頌之子正務雲鳳篤學力行名  
流引重孫廉文韓俱有文名

國朝姚文然字弱侯桐城人明癸未進士授翰林順治  
初擢禮科給事中康熙中掌印工戶二垣諸條奏  
皆關國計民生而請寬大臣提解一疏尤爲得體  
累晉大司寇理冤清滯校閱爰書常至夜午年衰  
成疾諸子諫之則曰勿殺人於一時例殺人於萬  
世其可忽乎卒諡端恪

張秉貞桐城人明辛未進士順治中歷官刑部尚書解枉釋滯多所平反改兵部運籌軍國以勤勞卒於官諡僖和

江臯字在湄桐城人順治辛丑進士由瑞昌令遷守鞏昌大軍入蜀民困於兵臯與帥約軍卒無符信者不得入境忽有數騎將入村漁奪詰問其照身不得悉囚送軍門斬以徇由是肅然不犯改補柳州資遣被掠婦女遷平慶道運給軍需歷隴



塞賀蘭諸險作籌邊九策擢大叅罷歸官轉七階家無半畝年八十一卒

盧璣字爾琛潛山人順治戊子恩薦授樂昌令均徭役緩催科累遷永寧同知永寧故南詔地羗蠻雜處璣德化漸摩俗爲一變署蒙化數月振興文學晉温州郡守莅任三月興利除害以勤勞成疾卒於官

黃之麟字瑞白宿松人順治間由明經任江西興

國令興界楚閩百粵久爲賊窟之麟招降賊渠王大勇又滅賊渠孫可貴勦梅窖峒賊曾拱宸等寇亂始平寬免賦額墾田糧二千八百石有奇士民德之

金繼望字又呂望江人順治六年拔貢除河南宜陽縣令兵燹之後招集勸墾民遂樂業擢兗州府黃河同知到任即周歷河干修築石香爐梁家樓新月諸堤水患又捐俸賑饑修曹縣學終九江太

守

高可極字爾建潛山人以歲薦知永豐縣下車即  
詳食鹽免充廣餉捐買馬不起民夫以老病去任  
士民焚香泣送數十里

姚文熊字望侯桐城人康熙丁未進士令蕭山地  
值衝繁又閩亂未定芻糧取給於邑調度有方民  
得不困遷階州州與蕃地鄰亂後益凋敝到任悲  
除無名之征上官按舊例發吏督催文熊縛其驕

橫者撻而遣之大計遂以不及例降調蕭人祀之  
姚文焱字彥昭桐城人八歲能詩年十四補博士  
弟子員康熙己酉登賢書司鐸長洲教士有方陞  
峽江令革陋規輕徭役興學校戢奸宄峽人德之  
以母喪歸

張芑字武仕桐城人以明經通判武昌署府篆值  
標弁夏逢龍叛被執不屈賊怒令褫衣冠縛置烈  
日中肌膚盡裂芑抗言益厲拘繫將戮之乘間夜

逸錄狀報部請師勦平復原官遷嘉定州懇荒  
修學士民德之

孫元衡字湘南桐城人以明經知新城縣縣苦水  
患元衡濬孝婦小清兩河以殺其勢築堤十八里  
以捍其衝舉卓異擢蜀之漢州牧招集流亡給種  
教耕皆得安土爐蠻亂身歷行間設法轉運不匱  
又舉卓異遷東昌守

張夔字次臯桐城人以明經歷知平山固安清苑

皆畿輔近邑夔所至仁惠有聲有鄴氏疑獄久未  
決夔至立辨又章氏爲強暴所逼廉得其狀一時  
稱爲神明舉荒政建義學毀淫祠臺臣文章薦之  
擢大名廣平兩郡司馬督理河務漳水決身親畚  
插捍禦堤防數月河患乃息被災之民捐俸賑給所  
活數千人

吳昉字五玉桐城人康熙乙卯副榜學古通經自  
守以正推產諸弟友愛篤摯善誘後學江南北

薰其教能文者甚衆司鐸豐邑士習文風爲之  
丕變再攝縣篆豪民殺人輦金求釋卒抵之法  
年八十卒於官

王玘字其人桐城人由廩貢教習爲藥城令歲革  
羨餘千金浚井數百助民灌田藥人德之擢紹興  
別駕濬三江牖及杭城內通商河俱百年堙廢之  
蹟以卓異累遷彰德太守

張廷瓚字卣臣相國英長子康熙己未進士荐登

宮尹趨承講幄屢膺纂修之任分校禮闈典試  
山左皆稱得人

聖祖北征沙漠三臨絕塞廷瓚以儒臣與扈從之列屢被  
殊恩務益恪慎厥職尤熟於掌故翰苑著作多出其手生  
平孝友任卹長子若霖字巖舉天性孝友好義樂  
施文行兼茂稱令子焉

夏瓚字景文桐城人博學工文以貢授雲南呈貢  
縣令振興文學革除陋規給牛種以勸墾歲饑賑



救全活甚衆

張若需字雲舉桐城人廷瓚次子康熙戊子舉於鄉初任嚴州同知攝義烏篆捐金造東門巨橋邑人名張公永濟橋建祠橋側祀之遷梧州守輯盜寧民平糶給種多著善蹟擢蒼梧鹽驛副使病卒特贈按察使銜雍正九年祀廣西名宦祠

江南通志卷一百四十六